

Rā 6, Reneti me te Mamaetanga – Rāmere/Paraire i te ahiahi

He Karakia mō ngā Rāmere/Paraire o te "Wā Noaiho", o ia rā rānei o te wā o Reneti me te Mamaetanga

Ka mea a Ihu, "Ā, ki te whakairihia ake ahau ki runga ake i te whenua, māku ngā tāngata katoa e kukume ki ahau."

Hoani 12.32

E te Atua kai whakaora
Te kai hoko o ngā tāngata katoa o te Ao
Waiho mā te mamaetanga o tōu rīpekatanga
E whakaara ake i ō pononga
Te Wairua mahaki. **Āmine.**

Te Kupu a te Atua

*Ētahi o ēnei Waiata a Rāwiri, ko rātou e whakarite ana i te Maramataka o te tau rānei, ā, ka mutu ia waiata, ia waiata, i ngā rā katoa o te tau, nā, ko tēnei, **Korōria ki . . .***

Te Rāwhitu tuatahi, me ngā Rātapu o Reneti me te Mamaetanga, nā Waiata 86

- 1 Whakatītahatia iho tōu taringa, e Ihowā whakahokia mai he kupu ki ahau; he ware hoki ahau, he rawakore.
- 2 Tiakina tōku wairua: he tapu hoki ahau; māu, e tōku Atua, e whakaora tāu pononga e whakawhirinaki atu nei ki a koe.
- 3 Tohungia ahau, e te Ariki: e karanga nei hoki ahau ki a koe i te rā roa nei.
- 4 Whakaharitia te wairua o tāu pononga; ka ara atu nei hoki tōku wairua, e te Ariki, ki a koe.
- 5 He pai hoki koe, e te Ariki, he ngāwari: e ranea ana hoki tāu mahi tohu ki te hunga katoa e karanga ana ki a koe.
- 6 Tahuri mai tōu taringa, e Ihowā, ki tāku inoi: whakarongo ki tōku reo unene.
- 7 Ka karanga ahau ki a koe i te rā o tōku pōuri: e whakahoki kupu mai hoki koe ki ahau.
- 8 Kāhore he rite mōu, e te Ariki, i roto i ngā atua: kāhore hoki he rite mō āu mahi.

- 11 Whakaakona ahau ki tāu ara, e Ihowā; ka haere ahau i runga i tōu pono: whakatapatahitia tōku ngākau ki te wehi i tōu ingoa.
- 12 Ka whakamoemiti katoa tōku ngākau ki a koe, e te Ariki, e tōku Atua: ka whakakorōria anō i tōu ingoa ake ake.
- 15 Ko koe ia, e te Ariki, he Atua atawhai, he tohu tangata: he pūhoi ki te riri, e hua ana te mahi tohu me te pono.
- 16 Tahuri mai ki ahau, tohungia hoki ahau: hōmai tōu kaha ki tāu pononga, whakaorangia te tama a tāu pononga wahine.
- 17 Whakakitea mai ki ahau he tohu mō te pai: kia kite ai te hunga e kino ana ki ahau, kia whakamā ai: nōu e Ihowā i āwhina i ahau, i whakamārie i ahau.

Te Rāwhitu tuarua, me ngā Rāhina/Mane o Reneti me te Mamaetanga, Waiata 32

- 1 Ka hari te tangata kua oti tāna hē te muru, tōna hara te hīpoki.
- 2 Ka hari te tangata kāhore nei e whakairia e Ihowā he hara ki a ia, ā, kāhore he hīanga i tōna wairua.
- 3 I ahau kīhai i kuihi, ngahengahe kau ōku iwi i tāku auētanga i te rā roa.
- 4 Nō tōu ringa i taimaha ki ahau i te ao, i te pō; kua whakaputaina kētia tōku mākūkūranga, anō nā te maroketanga o te raumati.
- 5 I whākina e ahau tōku hara ki a koe, kīhai hoki i huna i tōku kino: i mea ahau, “Ka whākina āku mahi tutū ki a Ihowā;” ā, murua ana e koe te kino o tōku hara.
- 6 Mō konei ka inoi ki a koe ngā tāngata tapu katoa i te wā e kitea ai koe: he pono ka ngawhā ngā wai nui, e kore e tata ki a ia.
- 7 Ko koe tōku piringa; māu ahau e whakaora i te pōuri, māu ahau e karapoti ki ngā waiata whakaora.
- 8 Ka tohutohungia koe e ahau, ka whakaakona koe ki te ara e haere ai koe; mā tōku kanohi koe e ārahi.
- 9 Kei rite koutou ki te hōiho, ki te muera rānei, kāhore nei he mātauranga; he mea kuku nei ō rāua kauae ki te paraire, ki te mōkā hei pupuri mai; ki te kore hoki, e kore e tata ki a koe.
- 10 He tini ngā mea whakapōuri mō te tangata hara: ko te tangata ia e whakawhirinaki ana ki a Ihowā, ka karapotia e te

atawhai.

- 11 Kia koa ki a Ihowā, whakamanamana, e te hunga tika: kia hari, hāmama, e te hunga ngākau tika katoa.

Te Rāwhitu tuatoru, me ngā Rātū/Tūrei o Reneti me te Mamaetanga, nā Waiata 31

- 1 E Ihowā, ko koe tāku e whakawhirinaki nei; kei whakamā ahau ake ake: whakaorangia ahau, he tika nei hoki koe.
- 2 Anga mai tōu taringa ki ahau; hohoro te whakaora i ahau: kia ai koe hei kōhatu kaha mōku, hei whare tiaki mōku.
- 3 Ko koe hoki tōku kōhatu, tōku pā: nā, kia mahara ki tōu ingoa, ā, ārahina ahau, tohutohungia hoki ahau.
- 4 Kapohia ahau i roto i te kupenga i hunā e rātou mōku; ko koe hoki tōku kaha.
- 5 Tēnei tōku wairua te tukua atu nei e ahau ki tōu ringa; nāu ahau i hoko e Ihowā, e te Atua o te pono.
- 6 E kino ana ahau ki te hunga e whakaaro ana ki ngā mea tekateka noa; e whakawhirinaki ana hoki ahau ki a Ihowā.
- 7 Ka whakamanamana ahau, ka hari ki tōu atawhai; mōu i titiro ki tāku tangi; i mātau hoki ki tōku wairua i ngā wā o te hē;
- 8 Kāhore ahau i kopia e koe ki roto ki te ringa o te hoariri: kua whakatūria e koe ōku waewae ki te wāhi nui.
- 9 Tohungia ahau, e Ihowā, kei te hē hoki ahau, pakoko kau tōku mata i te pōuri, tōku wairua me tōku kōpū.
- 10 Ka hemo nei hoki tōku ora i te tangi, me ōku tau i te auē; poto iho tōku kaha i tōku hē, kurupopo ana ōku iwi.
- 11 He tāwainga ahau nā ōku hoariri katoa; ko te tino mahi ia tēnā a ōku hoa noho tata, he mea wehi ahau nā ngā tāngata i mōhio ki ahau: ko te hunga i kite i ahau i waho, rere ana i ahau.
- 12 Kua warewaretia ahau me te tūpāpaku kua ngaro atu i te ngākau; kua rite ki te oko pakaru.
- 13 I rongu hoki ahau i te ngautuarā a te tini; i karapotia ahau e te wehi: i a rātou e rūnanga ana ki te hē mōku, i mea kia whakamatea ahau.
- 14 Ko ahau ia i whakawhirinaki ki a koe, e Ihowā: i mea, “Ko koe tōku Atua.”

- 15 Kei tōu ringa ōku tāima, whakaorangia ahau i ngā ringa o ōku hoariri, i te hunga e tūkinō ana i ahau.

Te Rāwhitu tuawhā, me ngā Rāapa/Wenerei o Reneti me te Mamaetanga, nā Waiata 31

- 16 Kia whiti tōu mata ki tāu pononga; whakaorangia ahau, he mahi tohu hoki tāu.
- 17 Kei whakamā ahau, e Ihowā; kua karanga hoki ahau ki a koe: kia whakamā te hunga kino, kia takoto puku i te rēinga.
- 18 Whakamutua te kōrero a ngā ngutu teka, he kino nei ā rātou kōrero mō te tangata tika, nā tō rātou whakapehapeha hoki, nā tō rātou whakahīhī.
- 19 Anō te nui o tāu pai kua rongōātia nei e koe mō te hunga e wehi ana ki a koe; i mahia nei e koe mō te hunga e whakawhirinaki ana ki a koe i te aroaro o ngā tama a te tangata!
- 20 Ka hunā rātou e koe ki te wāhi ngaro i tōu aroaro i ngā rauhanga a te tangata; ka hunā rātou e koe ki roto ki te tēneti, kei taea e te ngangau a ngā arero.
- 21 Kia whakapaingia a Ihowā, mōna i mea kia mīharotia tāna mahi tohu ki ahau i te pā kaha.
- 22 I kī hoki ahau i tōku pōtatututunga, “Kua motuhia mai ahau i mua i ōu kanohi:” ahakoa rā i rongō koe ki tōku reo inoi i tāku karangatanga ki a koe.
- 23 Arohaina a Ihowā, e tāna hunga tapu katoa: e tiakina ana e Ihowā te hunga pono, ā, he nui tāna utu ki te kaimahi whakapehapeha.
- 24 Kia māia, kia kaha ō koutou ngākau, e te hunga katoa e tūmanako ana ki a Ihowā.

Te Rāwhitu tuarima, me ngā Rāpare/Tāite o Reneti me te Mamaetanga, Waiata 27

- 1 Ko Ihowā tōku mārāma, tōku whakaoranga; kia wehi ahau i a wai? Ko Ihowā te kaha o tōku ora; ko wai e matakū ai ahau?
- 2 I te whakatatanga mai o te hunga kino, o ōku hoariri, o ōku hoa whāinga, ki te kai i ōku kikokiko, tutuki ana rātou, hinga ana.
- 3 Ahakoa whakapae noa te ope i ahau e kore tōku ngākau e wehi: ahakoa ara noa te pakanga ki ahau, ka au tonu ia ahau.

- 4 Kotahi tāku mea i inoi ai i a Ihowā, ko tāku tēnā e rapu ai: kia noho i te whare o Ihowā i ngā rā katoa e ora ai ahau, kia kite ai i te ātaahua o Ihowā, kia ui ai i roto i tōna temepara.
- 5 Ka hunā hoki ahau e ia ki tōna tēneti i te rā o te hē, ka hunā ki te wāhi ngaro i tōna tapenākara, ka hāpainga ahau ki runga ki te kōhatu.
- 6 Nā āianeī, ka teitei tōku māhunga ki runga ake i ōku hoariri, e karapoti nei i ahau; ā, ka patua e ahau i roto i tōna tapenākara he whakahere hari; ka waiata ahau, āe, ka hīmene ki a Ihowā.
- 7 Whakarongo mai ki tōku reo, e Ihowā, ua karanga ahau, tohungia ahau, whakahokia mai hoki he kupu ki ahau.
- 8 I a koe i mea, “Rapua e koutou tōku mata;” ka mea tōku ngākau ki a koe, “Ka rapu ahau i tōu mata, e Ihowā.”
- 9 Kua tōu mata e hunā ki ahau, kua tāu pononga e peia atu ua riri koe: ko koe tōku kaiāwhina, kei mahue ahau i a koe, kei whakarērea e koe e te Atua o tōku whakaoranga.
- 10 Ki te whakarērea ahau e tōku pāpā, e tōku whaea, ko Ihowā hei tukunga atu mōku.
- 11 E Ihowā, whakaakona ahau ki tāu ara; arahina ahau i te ara tika, he hoariri hoki ōku.
- 12 Kua ahau e tukua ki te hiahia o ōku hoariri; kua whakatika mai hoki ki ahau he kaiwhakapae teka, me te hunga manawa nanakia.
- 13 Kua ngohe ahau, me i kua ahau i whakaponu, tērā ahau e kite i te pai o te Atua i te whenua o te ora.
- 14 Tāria a Ihowā: kia māia, ā, kia kaha tōu ngākau; inā, tāria a Ihowā.

Te Rāwhitu tuaono, me ngā Rāmere/Paraire o Reneti me te Mamaetanga, nā Waiata 69

- 1 Whakaorangia ahau e te Atua, ka tae mai hoki ngā wai ki roto ki tōku wairua.
- 2 Ka tapoko ahau ki te oru hōhonu, ki te wāhi kāhore nei he tūnga: kua tae ahau ki ngā wai hōhonu, ngaro iho ahau i ngā waipuke.
- 3 Kua ruwha ahau i tāku tangi; kua maroke tōku korokoro: pakoko kau ōku kanohi i ahau e tatari nei ki tōku Atua.
- 4 Tini kē i ngā makawe o tōku mātenga te hunga e kino noa ana

ki ahau: he kaha rawa te hunga e mauāhara noa ana ki ahau, e mea nei kia whakamatea ahau; utua ana e ahau i reira ngā mea kīhai i tangohia e ahau.

- 5 E te Atua, e mātau ana koe ki tōku kūware; kāhore hoki ōku hē e ngaro i a koe.
- 6 E te Ariki, e Ihowā o ngā mano kaua te hunga e tatari ana ki a koe e whakamā i ahau: e te Atua o Iharaira, kei numinumi kau i ahau te hunga e rapu ana i a koe.
- 7 Mōu hoki ahau i waiho ai hei tāwainga: ngaro iho tōku mata i te whakamā.
- 8 He tangata kē ahau ki ōku hoa ake: hei tautangata ki ngā tama a tōku whaea.
- 9 Ka pau hoki ahau i te aroha ki tōu whare: kua tau anō ki ahau ngā tāwai a te hunga e tāwai ana ki a koe.
- 10 I ahau i tangi, i whakatiki hei whiu i tōku wairua, ka waiho tēnā hei tāwainga mōku.
- 11 I kākahu hoki ahau i te kākahu taratara mōku, ā, i waiho hei whakatauki mā rātou.
- 12 Kei te kōrero kino mōku te hunga e noho ana i te kūwaha: waiatatia ana ahau e te hunga haurangi wāina.
- 13 Ko ahau ia, ki a koe tāku inoi, e Ihowā, i te wā e manakohia ai: whakahokia mai he kupu ki ahau, e te Atua, i runga i te nui o tōu aroha, o te pono o tāu whakaoranga.
- 14 Whakaorangia ahau i roto i te oru, kei toremi: kia ora ahau i te hunga e kino ana ki ahau, i ngā wai hōhonu anō hoki.
- 15 Kei ngaro ahau i te waipuke, kei horomia e te rire; kei kopia anō te waha o te poka ki runga ki ahau.
- 16 E Ihowā whakahokia mai he kupu ki ahau; he pai hoki tōu atawhai: tahuri mai ki ahau, kia rite ki te nui o āu arohatanga.
- 17 Ā, kaua e hunā tōu mata ki tāu pononga; e pōuri ana hoki ahau: hohoro te whakahoki kupu mai ki ahau.
- 18 Whakatata mai ki tōku wairua, hokona: whakaorangia ahau, e mahi nei ōku hoariri.
- 19 E mātau ana koe ki tōku tāwainga, ki tōku whakamā, ki tōku numinumi: kei tōu aroaro ōku hoariri katoa.
- 20 Marū noa tōku ngākau i te tāwai; ā, kī tonu ahau i te pōuri: i titiro ahau ki tētahi hei aroha mai, ā, kore ake; ki ētahi hei whakamārie, ā, kīhai i kitea.

- 21 I hōmai he au hei kai māku: i tōku matewaitanga anō i whakainumia ahau ki te winika.
- 29 Ko ahau ia, he rawakore, he pōuri; kia whakateiteitia ake ahau, e te Atua, e tāu whakaoranga.
- 30 Ka whakamoemiti tāku waiata ki te ingoa o te Atua, ka whakanui anō tāku whakawhetai i a ia.
- 31 Pai rawa tēnei ki a Ihowā i te pūru i te kau, i te mea whai haona, whai maikuku.
- 32 Kua kite te hunga māhaki, kua hari: ka ora anō ō koutou ngākau, e te hunga e rapu nei i te Atua.
- 33 Nō te mea, ka rongō a Ihowā ki ngā rawakore, e kore anō e whakahāwea ki āna herehere.
- 34 Kia whakamoemiti te rangi me te whenua ki a ia, ngā moana, me ngā mea katoa e tere ana i roto.
- 35 Nō te mea, tērā e whakaorangia e te Atua a Hiona, ka hangā anō e ia ngā pā o Hūrā; ā, ka noho rātou ki reira, ka riro hoki a reira i a rātou.
- 36 Ā, ka nohoia a reira e ngā uri o āna pononga: hei kāinga tupu anō a reira mō te hunga e aroha ana ki tōna ingoa.

Te Rāwhitu tuawhitu, me ngā Rāhoroi/Hātarei o Reneti me te Mamaetanga, Waiata 90

- 1 E te Ariki, ko koe tō mātou nohoanga i ngā whakatupuranga katoa.
- 2 Kāhore anō i whānau noa ngā maunga, kāhore i hangā e koe te whenua me te ao, ko koe te Atua nō tua whakarere ā ake tonu atu.
- 3 E whakahokia ana e koe te tangata kia mongamonga noa, ā, e mea ana, “E hoki, e ngā tama a te tangata.”
- 4 Ki tāu titiro hoki, he rite ngā tau kotahi mano ki te rā onanahi, kua pahure atu nei, ki te mataaratanga hoki i te pō.
- 5 Me te mea nā te waipuke tāu kāhakina i a rātou; he moe rātou: i te ata, ānō he tarutaru e tupu ana.
- 6 I te ata e tupu ana, e pihi ana: i te ahiahi kua kotia, kua maroke.
- 7 Kua hemo nei hoki mātou i tōu riri: ka ohorere hoki i tōu āritatanga.
- 8 Kua makā e koe ō mātou kino ki tōu aroaro, ō mātou mea

huna ki te mārama o tōu mata.

- 9 Ka pau ō mātou rā katoa, me te riri anō koe: hemo ake ō mātou tau ānō he kōrero e kōrerotia ana.
- 10 Ko ngā rā o ō mātou tau e whitu tekau tau; ā, ki te whai kaha, ka waru tekau tau; heoi, he mahi māuiui, he pōuri tō rātou kaha; ka hohoro hoki te hātepea atu, ā, ka rere atu mātou.
- 11 Ko wai te mātau ana ki te kaha o tōu riri? Rite pū ki te wehi ki a koe tōu riri.
- 12 Ākona mātou ki te tatau i ō mātou rā, kia anga ai te ngākau ki te whakaaro.
- 13 Hoki mai, e Ihowā, kia pēhea ake te roa? Ā, kia puta kē he whakaaro mōu ki āu pononga.
- 14 Kia nā mātou i te ata i tāu mahi tohu: kia hari ai mātou, kia koa ai, i ō mātou rā katoa.
- 15 Whakaharitia mātou, kia rite ki ngā rā i whakawhiua ai mātou e koe, ki ngā tau i kite ai mātou i te kino.
- 16 Kia puta mai tāu mahi ki āu pononga, me tōu korōria ki ā rātou tamariki.
- 17 Ā, hei runga i a mātou te ātaahua o Ihowā, o tō mātou Atua: whakapūmautia anō ki a mātou te mahi a ō mātou ringa, āe rā, te mahi a ō mātou ringa, whakapūmautia e koe.

Waiata Whakamoemiti nā te Kawenata Tawhito

ko tēnei

Waiata Whakamoemiti tuatahi

- 1 Ko wai i whakapono ki tā mātou kōrero; i whakaaturia rānei ki a wai te ringaringa o Ihowā?
- 2 Ka tupu ake hoki ia ki tōna aroaro, ānō he rākau wana, me te pakiaka hoki i te oneone maroke, kāhore ōna ahuareka, kāhore hoki he pai; ā, ka titiro tātou ki a ia, tē ai he ataahua e minamina ai tātou ki a ia.
- 3 I whakahēngia, i whakakāhoretia ia e te tangata; he tangata pōuri, kua mōhio hoki ki te tangi: ā, i āhua huna ngā kanohi ki a ia; i whakakāhoretia, kīhai hoki tātou i whakaaro ki a ia.
- 4 He pono, nāna ō tātou mate i pīkau, nāna hoki i waha ō tātou pōuri: ko tātou ia i mea, i tukitukia, i patua ia e te Atua, i whakawhiua.

- 5 Kāhore, i werohia ia mō ō tātou hē, i kurua mō ō tātou kino: nōna te whiunga i mau ai tō tātou rongō, kei ōna kārawarawa hoki he rongōā mō tātou.

Ihāia 53.1-5

Korōria ki . . .

ko tēnei rānei

Waiata Whakamoemiti tuarua

- 1 Rapua a Ihowā, kei kitea ana ia: karangatia atu, kei tata ana mai ia.
- 2 Kia whakarere te tangata kino i tōna ara, te tangata mahi hē i ōna whakaaro; kia hoki ki a Ihowā, ā, ka aroha ia ki a ia; ki tō tātou Atua hoki, he nui rawa hoki tāna mahi tohu.
- 3 Ehara hoki ōku whakaaro i ō koutou whakaaro, ō koutou huarahi i ōku huarahi, e ai tā Ihowā.
- 4 Tā te mea e ikeike ake ana te rangi i te whenua, waihoki ko ōku huarahi e ikeike ake ana i ō koutou huarahi, ko ōku whakaaro i ō koutou whakaaro.
- 5 Ka rite hoki ki te ua rāua ko te hukarere e rere iho ana i te rangi, ā, e kore e hoki ki reira; engari e whakamākūkū ana i te whenua, e mea ana kia whai hua, kia pihi ake, kia hōmai anō he purapura mā te kaiwhakatō, he taro mā te tangata e kai ana:
- 6 Ka pēnā anō tāku kupu e puta ana i tōku māngai: e kore e hoki kau, mai ki ahau; engari ka meatia tāku i pai ai, ka taea hoki tāku i unga atu ai.

Ihāia 55.6-11

Korōria ki . . .

Ngā Pānui Karaipiture

ko tētahi o ēnei pānui, ko tētahi nō te Maramataka o te tau rānei

Te Rāwhitu tuatahi, me ngā Rātapu o Reneti me te Mamaetanga

Ā, nō ka tae ki te ono o ngā hāora, ka pōuri a runga o te whenua katoa, taea noatia te iwa o ngā hāora. Ā, i te iwa o ngā hāora ka karanga a Ihu, he nui te reo, ka mea, “Eroi, Eroi, rama hapakatani?” ko te tikanga tēnei ina whakamāoritia, “E tōku Atua,

e tōku Atua, he aha koe i whakarere ai i ahau?” Nā, he nui te reo i puaki i a Ihu, ā, hemo ake. Ā, nō te kitenga o te keneturio, e tū hāngai atu ana ki a ia, i pērā te āhua o tāna tukunga i tōna wairua, ka mea ia, “He pono ko te Tama a te Atua tēnei tangata.”
Māka 15.33-34, 37, 39

Te Rāwhitu tuarua, me ngā Rāhina/Mane o Reneti me te Mamaetanga

“He kāhore noa iho tēnei ki a koutou, e koutou e haere nei i te ara? Whakaaro mai, titiro mai, e rite ana rānei tētahi mamae ki tōku mamae, e mahia nei mōku, ki tā Ihowā nei whiu mōku i te rā i mura ai tōna riri? Nā ēnei mea ahau i tangi ai: ko tōku kanohi, tārere ana te wai o tōku kanohi: nō te mea kei tawhiti atu i ahau te kaiwhakamārie hei whakahauora ake i tōku wairua: ko āku tamariki kei te noho kau noa iho, nō te mea kua kaha te hoariri.”
Ngā Tangi a Heremaia 1.12, 16

Te Rāwhitu tuatoru, me ngā Rātū/Tūrei o Reneti me te Mamaetanga

Ka mea a Ihu, “Haere mai ki ahau, e koutou katoa e māuiui ana, e taimaha ana, ā, māku koutou e whakaokioki. Tangohia tāku ioka ki runga ki a koutou, kia whakaakona koutou e ahau; he ngākau māhaki hoki tōku, he ngākau pāpaku: ā, e whiwhi koutou ki te okiokinga mō ō koutou wairua. He ngāwari hoki tāku ioka, he māmā tāku pīkaunga.”
Matiu 11.28-30

Te Rāwhitu tuawhā, me ngā Rāapa/Wenerei o Reneti me te Mamaetanga

E akiakina ana hoki mātou e te aroha o te Karaiti; i a mātou e whakaaro ana i tēnei, kotahi i mate mō te katoa, nō reira, he hunga mate te katoa; I mate hoki ia mō te katoa, kia kaua ai te hunga e ora ana e ora mō rātou anō ā muri ake nei, engari, mō tēnei i mate nei mō rātou, ā, i ara ake anō.
2 Koroniti 5.14-15

Te Rāwhitu tuarima, me ngā Rāpare/Tāite o Reneti me te Mamaetanga

“Nō te hokinga ake ia o ōna whakaaro, ka mea ia, ‘Anō te tini o ngā kaimahi a tōku pāpā, he nui noa atu ā rātou taro, ko ahau ia ka

ngaro i te kaikore! 'Ka whakatika ahau, ka haere ki tōku matua, ka mea ki a ia, "E pā, kua hara ahau ki te rangi, ki tōu aroaro anō, Ā, heoi anō tikanga kia kīa ahau he tama nāu: meinga ahau kia rite ki tētahi o āu kaimahi." ' Nā, ka whakatika ia, ā, haere ana ki tōna matua. Nā, i a ia anō i tawhiti, ka kite tōna matua i a ia, ka aroha, ka oma, hinga iho ki tōna kakī, kihi ana i a ia."

Ruka 15.17-20

Te Rāwhitu tuaono, me ngā Rāmere/Paraire o Reneti me te Mamaetanga

I whakahēngia, i whakakāhoretia ia e te tangata; he tangata pōuri, kua mōhio hoki ki te tangi: ā, i āhua huna ngā kanohi ki a ia; i whakakāhoretia, kīhai hoki tātou i whakaaro ki a ia. He pono, nāna ō tātou mate i pīkau, nāna hoki i waha ō tātou pōuri: ko tātou ia i mea, i tukitukia, i patua ia e te Atua, i whakawhiua. Kāhore, i werohia ia mō ō tātou hē, i kurua mō ō tātou kino: nōna te whiunga i mau ai tō tātou rongo, kei ōna kārawarawa hoki he rongoā mō tātou.

Ihāia 53.3-5

Te Rāwhitu tuawhitu, me ngā Rāhoroi/Hātarei o Reneti me te Mamaetanga

Ka mea a Ihu, "Ko ahau te hēpara pai, he hēpara pai ka tuku i a ia anō kia mate mō ngā hipi. Tēnā ko te tangata e utua ana, ehara nei i te hēpara, ehara nei i a ia ngā hipi, i tōna kitenga i te wuruhi e haere mai ana, whakarērea ake e ia ngā hipi, oma ana: nā, ka hopukia rātou e te wuruhi, ā, whakamararatia ana ngā hipi. Ka oma te tangata e utua ana, nō te mea e utua ana ia, kāhore hoki ōna whakaaro ki ngā hipi. Ko ahau te hēpara pai, e mātau ana hoki ki āku, ā, e mātau ana āku ki ahau. Pērā tonu me tō te Matua mātau ki ahau, me tōku mātau hoki ki te Matua: e tuku ana hoki ahau i ahau ki te mate mō ngā hipi."

Hoani 10.11-15

Te Waiata a te Puhi Tapu, a Meri

Ka whakanui tōku wairua i te Ariki:

a e hari ana tōku wairua ki te Atua, ki tōku Kaiwhakaora;

Mōna i titiro ki te iti o tāna pononga:

tā te mea hoki kātahi ahau ka kīa e ngā whakatupuranga katoa e haere ake nei, he wahine hari.

He nui hoki ngā mahi a te Mea Kaha ki ahau:
ā e tapu hoki tōna ingoa.

He mahi tohu tāna ki te hunga e wehi ana ki a ia:
ki tēnei whakatupuranga, ki tēnei whakatupuranga.

Kua whakaputaina he kaha e ia, arā e tōna ringa:
nāna te hunga whakakake i marara ai i te whakaaro
o ō rātou ngākau.

Kua whakatakā e ia te hunga kaha i ngā nohoanga:
ā, whakateiteitia ake ana te hunga iti.

Kua whakakā e ia te hunga mate hiakai ki ngā mea pai:
ā tonoa kautia atu ana te hunga taonga.

Kua tautokona e ia a Iharaira, tāna pononga:
he whakamaharatanga hoki ki tāna mahi tohu.

Ki a Āperahama, rātou ko tāna whānau ake tonu atu:
pērā hoki me tāna i kōrero ai ki ō tātou mātua.

Ruka 1.46-55

**Kia whakakorōriatia te Matua, te Tama:
me te Wairua Tapu;
ko te ritenga ia i te tīmatanga, ā tēnei anō ināiane:
ā ka mau tonu iho, ā ake ake. Āmine.**

ko tēnei rānei

**Korōria ki te Matua, ki te Tama,
ki te Wairua Tapu;
mai i te tīmatanga, ki tēnei wā,
ā, haere ake nei. Āmine.**

Ngā Īnoi

Ngā Īnoi takawaenga me ngā whakawhetai

E te Ariki, kia aroha mai.

E te Karaiti, kia aroha mai.

E te Ariki, kia aroha mai.

*Te Īnoi mō te rā, te Īnoi mō te Rāmere/Paraire, te Īnoi mō Reneti me te
Mamaetanga rānei*

Te Īnoi mō Rāmere/Paraire

E te Atua o te koraha, i a mātou e aru ana i a Ihu ki te wāhi kāore

nei mātou e mōhio,
kia mōhio mātou ki te kaiwhakawai i tōna haerenga mai;
tukua kia kai mātou i tāu taro,
kia mahi mātou i tō ao, ā kia koropiko ki a koe anake.
Āmine.

Te Īnoi mō Reneti

E te Atua kaha rawa,
i noho kore kai tāu tama a Ihu Karaiti i te koraha mō ngā rā e whā
tekau;
hōmai koa te aroha noa ki te whakarongo ki tōu Wairua kia hāngai
ā mātou mahi katoa ki a koe;
ā pēnā i a koe e mōhio mai nā ki ō mātou ngoikoretanga
kia mōhio hoki mātou ki tōu kaha whakaora;
ko Ihu Karaiti tō mātou Kaihoko.
Āmine.

Te Īnoi mō te Mamaetanga

E te Atua ngākau aroha, mutunga kore,
titiro atawhai mai ki tēnei tāu whānau
nāna nei i pai ai tō mātou Ariki a Ihu Karaiti
kia tukua ia ki ngā ringaringa o ōna hoariri
kia whakamatea ai hoki i runga i te rīpeka;
meinga mātou kia hari
mō ngā hua o tōna mamae;
ko ia e ora ana e kīngi tahi ana
me koe me te Wairua Tapu,
kotahi anō Atua, āianeī, ā ake tonu atu.
Āmine.

Te Īnoi a te Ariki

E te Ariki, maharatia mai mātou i tōu rangatiratanga;
Akona hoki mātou ki te inoi.
E tō mātou Matua i te rangi
Kia tapu tōu Ingoa.
Kia tae mai tōu rangatiratanga.
Kia meatia tāu e pai ai
ki runga ki te whenua,
kia rite anō ki tō te rangi.
Hōmai ki a mātou āianeī
he taro mā mātou mō tēnei rā.
Murua ō mātou hara,

Me mātou hoki e muru nei
i ō te hunga e hara ana ki a mātou.
Aua hoki mātou e kawea kia whakawaia;
Ēngari whakaorangia mātou i te kino:
Nōu hoki te rangatiratanga, te kaha,
me te korōria,
Ake ake ake. Āmine.

Kia tau ki a tātou katoa
te atawhai o tō tātou Ariki, o Ihu Karaiti,
me te aroha o te Atua,
me te whiwhinga tahitanga ki te Wairua Tapu,
ake ake. Āmine.